

淵鑑類函

卷四十七之卷四十九

淵鑑類函卷四十七

帝王部八

符命

符命一

原春秋潛潭巴曰里社鳴此里有聖人其响則百姓歸之春秋孔演圖曰天子皆五帝之精寶各有題序以

次運相據起必有神靈符紀使開階立遂河圖挺佐

輔曰黃帝修德立義天下大治乃召天老而問焉余夢見兩龍挺白圖以授余於河之都天老曰河出龍圖雒出龜書紀帝錄列聖人之姓號興謀治太平然後鳳皇處之今鳳皇以下三百六十日矣天其受帝圖乎黃帝

乃被齋七日至於翠嬀之川大鱸魚折溜而至乃與天
老迎之五色畢具魚汎白圖蘭葉朱文以授黃帝名曰
錄圖 尚書中候曰帝堯即政榮光出河休氣四塞龍
馬銜甲赤文綠字甲似龜背五色有列星之分斗政之
度帝王紀錄興亡之數

增

又曰朕率羣臣沈璧於洛

河俟於下稷赤光起元龜負書出赤文綠字 帝王世

紀曰堯佐帝摯受封於唐年二十而登帝位以火承木

景星曜於天甘露降於地朱草生於郊鳳皇止於庭

宋志曰堯在位七十年將以天下禪舜乃潔齋修壇於

河雒率舜等升首山遵河渚有五老游焉蓋五星之精

也相謂曰河圖將來告帝以期知我者重瞳黃姚視五
老飛爲流星上入昴

原 雒書靈準聽曰舜受終鳳皇

儀黃龍感朱草生蓂莢莪西王母授益地圖

西王母得益地之圖

以獻

干寶搜神記虞舜耕於歷山得玉曆於河際之巖

舜知天命在己體道不倦

增 宋志曰夏道將興青龍

止於郊祝融降於崇山

原 帝王世紀禹父既放降在

匹庶有聖德夢日洗於河西四岳師舉之舜進之堯

尚書璇璣鈴曰禹開龍門導積石元圭出刻曰延喜玉

受德天賜佩

增 河圖曰禹治水功大天帝以寶文大

字賜禹佩之以渡北海弱水之灘

洪範曰天錫禹洪

范九疇彝倫攸敘

原尚書中候曰臣觀河伯面長人

首魚身出水曰吾河精也授臣河圖 隋巢子曰昔三

苗大亂天命夏禹於元宮有大神人面鳥身降而福之

司祿益富而國家實司命益年而民不夭四方歸之禹

乃克三苗而神民不違 墨子曰夏桀時天乃命湯於

騶宮有神來告曰夏德大亂往攻之予必使汝大戡之

尚書中候曰天乙在亳諸鄰國襁負歸德東觀乎雒

降三分譬黃魚雙躍出濟於壇化爲黑玉赤勒曰元精

天乙受神福伐桀克 春秋元命苞曰殷紂之時五星

聚於房房者蒼神之精周據而興 **增**竹書曰初黃帝

之世讖言曰西伯爲王期在甲子昌制命發行誅旦行道及公劉之後十三世而生季歷季歷三十年飛龍盈於殷之牧野此蓋聖人在下位將起之符也子昌爲西伯作邑於豐文王之妃曰太姒夢商庭生棘太子發植梓樹於闕間化爲松柏棧柞以告文王文王幣率羣臣與發並拜告夢季秋之甲子赤爵銜書及豐置於昌戶

昌拜稽首受其文要曰姬昌蒼帝子亡殷者紂

又按尚書帝命

驗曰

季秋之甲子赤爵銜丹書入於豐止於昌戶其書

曰敬勝怠者吉怠勝敬者滅義勝欲者從欲勝義者凶

凡事不強則枉不敬則不正枉者廢滅敬者萬世以仁

得之以仁守之其量百世以不仁得之以仁守之其量

十世以不仁得之以不仁守之不及其世

原琴操曰受命者謂文王受天

命而王文王以紂時爲岐侯躬修道德執行仁義百姓
親附是時紂爲無道刳胎斮廢壞仁人天統易運諸
侯瓦解皆歸文王其後有鳳皇銜書於文王之郊文王
曰殷帝無道虐亂天下皇命已移不得復久乃作鳳皇
之歌其章曰翼翼翔翔彼鸞皇兮銜書來游以命昌兮

瞻天案圖殷將亡兮蒼蒼昊天始有萌兮神連精合謀

於房兮尚書中候曰呂尚釣磻谿得玉璜刻曰姬受

命呂佐旌

旌理也

呂氏春秋曰周文王時見大赤鳥銜

書集於周社文王曰火氣勝故其色上赤墨子曰商

王紂時周武王見三神曰予旣沈瀆殷紂於酒德矣汝

往攻之予必使汝大戡之 又曰赤烏銜珪降周之岐

社曰命周文王伐殷有國河出錄圖地出乘黃天錫武
王黃鳥之旗 **增**宋志曰武王伐紂渡孟津中流白魚

入王舟王俯取魚長三尺目下有赤文成字言紂可伐

燔魚以告天有火自天止於王屋流爲赤烏烏銜穀焉
穀者紀后稷之德火者燔魚以告天天火流下應以吉
也 **原**周語內史過曰昔夏之興也夜融降於崇山其

亡也回祿信於聆隧商之興也檇杙次於丕山其亡也
夷羊在牧周之興也鸞鷟鳴於岐山其衰也杜伯射王
於鄆是皆神明之志者也 琴操曰魯哀公十四年西

狩薪者獲麟擊之傷其左足將以示孔子孔子道與相
逢見俛而泣抱麟曰爾孰爲來哉孰爲來哉反袂拭面
仰視其人龍顏日角夫子奉麟之口須臾吐三卷圖一
爲赤伏劉季興爲王二爲周滅夫子將終三爲漢制造
作考經夫子還謂子夏曰新主將興其人如得麟者
尚書帝命驗曰東南紛紛注精紀昌光出軫已圖之鄭
康成注曰謂劉氏也謂火精當起翼軫之野 尚書考
靈曜曰河圖子提期地留赤用藏龍吐珠鄭康成注曰
河圖子劉氏而提起也珠寶物喻道也赤漢當用天之
祕道故河龍吐之

增帝王世紀曰太上皇之妃曰媼

是爲昭靈后名含始遊於洛地有玉雞銜赤珠出刺曰
玉英吞此者王舍始吞之生邦字季

原史記曰高祖

被酒夜經豐西澤中令一人行前行前者還報曰前有
大蛇當徑高祖乃前拔劒斬蛇蛇分爲兩道開後人來
至蛇所有一老嫗夜哭問之嫗曰吾子白帝子化爲蛇
當道今爲赤帝子斬之因忽不見秦始皇帝常曰東南
有天子氣於是東遊高祖隱于芒碭山澤間呂后與人
俱求常得之高祖怪問呂后呂后曰季所在山居常有
雲氣故往常得季 又曰范增說項羽曰沛公居東貪
於財貨好美姬今入關財貨無所取婦女無所幸此其

志不在小吾令人望氣皆爲龍虎成五采此天子氣也

漢書曰高祖元年冬十月五星聚於東井從歲星也

東井秦分野漢以義取天下之應也

增拾遺記曰漢太上皇微時遊山

澤間有冶鑄曰若得腰間佩刀雜治中即成神器可以

克天下昂星精爲輔可以殲三殍太上皇曰此物名乚

首遂解投煙燄中及劒成授上皇上皇以賜高祖乃殲

三殍宅天下鉤命洩云蕭何昂星精項羽陳勝吳廣爲

三殍

原漢書曰昭帝時上林柳樹斷臥地一朝起立

生枝葉有蟲食其葉成文字曰公孫病已立又曰昌

邑王問社有枯樹復生枝葉睦孟以爲木下民象當有

廢改之象公孫氏從民間受命爲天子者後宣帝立帝
本名病已

增

搜神記曰秦文公時陳倉人獵得獸若

羸不知名牽以獻之逢二童子童子曰此名爲媚常在
地中食死人腦即欲殺之拍捶其首媚亦語曰二童子
名陳寶得雄者王得雌者霸陳倉人乃逐二童子化爲
雉雌上陳倉北坂爲石秦祠之雄者飛至南陽其後光
武興焉 後漢書曰初哀帝時夏賀良上言漢家曆運
中衰當再受命於是改號太初元年及王莽篡位忌惡
劉氏以錢文有金刀故改爲貨泉或以貨泉字文爲白
水真人後望氣者蘇伯阿遙見舂陵郭曄曰氣佳哉鬱

鬱蔥蔥然初道士西門君惠李守等亦云劉秀當爲天子

原東觀漢記曰光武帝夜生時有赤光室中盡明皇考異之使卜者王長卜之長曰此善事不可言是歲有嘉禾生一莖九穗長大於凡禾縣界大豐熟因名上曰秀 又曰光武從邯鄲避王郎兵至滹沱河導吏還言河水流澌無船不可渡左右皆惶畏爲王郎所及上命王霸前往視之實然霸念還言恐驚衆雖不可渡且臨水止尚可爲阻即白曰冰堅可渡士衆大喜上大笑曰果妄言也叱至河流澌冰合可履強以囊盛沙布冰上乃渡渡未畢數車而冰陷也 又曰上歸舊廬望見

廬南有火光以爲人持火呼之光遂赫然屬天有頃不見上異之 又曰諸將請上尊號初王莽時上與伯叔

及姊舅鄧晨穰人蔡少公坐語少公道讖言劉秀當爲

天子或曰是國師劉子駿也上戲曰何由知非僕也坐

者皆大笑時傳聞赤伏符不見文章軍中所上未信到

鄩上所與長安同舍諸生彊華自長安奉赤伏符詣鄩

與上會羣臣復伏固請乃命有司設壇於鄩之千歲亭

六月即皇帝位

按赤伏符曰劉秀發兵捕不道四夷雲集龍鬪於野四七之際火爲主注云赤

伏符名漢德尚火赤火色伏藏也四夷雲集龍鬪於野羣雄角力也四七二十八也高祖至光武合二百二十

八年也一說光武以二十八歲起兵

魏志曰桓帝時有黃星見於楚宋

之分遼東殷馘善天文言後五十歲當有真人起於梁沛之間其鋒不可當至是凡五十年而太祖破袁紹天下莫敵矣 吳錄曰孫堅墓上數有光如雲氣五色上屬天下蔓延數里父老相謂曰此非凡氣孫氏其興乎

吳書曰孫堅母懷妊夢腸繞吳閭門孫策母懷策夢月入懷懷孫權夢日入懷 武昌記曰孫權獵於樊山

見一姥問獵何得荅曰止得一豹姥曰何不豎其尾忽然不見因爲立樊姥廟 魏氏春秋曰明帝青龍三年張掖郡刪丹縣金山元川溢涌寶石負圖狀象靈龜立於川西有石馬七其一仙人騎之其一羈絆之其五有

形而不善成有玉匣開蓋於前上有玉字玉琰二玉璜
一又有麒麟在東鳳皇在南白虎在西犧牛在北馬自
中布列有字曰大紂曹金但取之此司馬氏革運之徵
增宋書曰吳之未亡也吳郡臨平湖一旦自開湖邊
得石函中有小青石刻作皇帝字舊言臨平湖塞天下
亂開則天下太平吳人以爲祥俄而吳滅後元帝興於
江左吳亡後蔣山上常有紫雲術者曰江東猶有帝王
氣 宋書曰晉武帝咸寧元年大風吹帝社樹折有青
氣出社中占者以謂東甓有天子氣時琅邪武王伋封
東甓伋元帝祖也 **原**臧榮緒晉書曰王廙爲鄱陽太

守有枯樟樹更生王敦表勸進中宗曰皓獸應瑞而來
臻樟樹久枯而更榮 孫盛晉陽秋曰秦始皇時望氣
者言五百年後金陵之地有天子氣 又曰太安中歲
鎮辰太白四星聚於牛女之間後中宗即位於揚州也
又曰太安中童謠曰五馬浮渡江一馬化爲龍永嘉
大亂王室淪覆惟琅邪西陽汝南南頓彭城五王獲濟
至是中宗登阼先是五鐸見於晉陵若合符契 豫章
記曰松陽門內有大梓樹大四十五圍舉樹盡枯死永
嘉中一旦復更榮茂大興中元皇帝果繼大業庾仲初
揚都賦所云槐木薈於豫章郭璞南郊賦云弊梓擢秀